



COA a scoge ocho atleta pa Beca Olimpico Rio 2016

ORANJESTAD - COA kier a anuncia cu e aña aki un biaha mas Comité Olimpico Internacional ta otorga Beca Olimpico pa e Weganan Olimpico Rio 2016 na nos atletanan local. A scoge ocho atleta cu lo representa Aruba na 2016.

E atletanan Kyra Hoevertsz y Anouk Eman di landamento sincronisa, Monica Pimentel y Stuart Smit di taekwondo, Allyson Ponson y Jordy Groters di landamento, Nicole van der Velden y Thijs Visser di vela a keda scogi pa bin na remarca pa haya e Beca Olimpico aki. Un beca Olimpico tin como meta pa duna un atleta apoyo di e nivel mas halto, pa asina e por prepara su mes miho y trata di logra un clasificacion pa Weganan Olimpico. Cu e apoyo aki e atleta tin acceso na facilidadnan di entrenamiento superior, na coachnan specialisa y por participa na mas competencia clasificacion.

E proceso pa por a yega na e



ocho atletanan aki a envolvi, na nivel nacional, e federacionnan nacional di taekwondo, landamento y vela.

E federacionnan tabata di opinion cu e atletanan aki tin e chens mas real pa por logra un clasificacion pa e Weganan Olimpico di Rio 2016. COA a presenta e ocho candidatonan na Olympic Solidarity di Comité Olimpico Internacional algun luna pasa, cu na su turno a envolvi e respectivo federacionnan internacional, cu a analisa si e atletanan tin suficiente nivel tecnico pa por bin na remarca

pa un beca. Despues di varios luna e bon noticia a drenta: IOC a aproba pa otorga na e ocho atletanan un beca Olimpico pa Rio 2016. Un logro grandi pa e atletanan, un logro grandi pa deporte Arubano.

Tur ocho atleta ta biba, studia y ehersce nan deporte den exterior, nan lo sigui entrena den exterior, como parti di nan desaroyo deportivo. E beca ta yuda cubri un parti di e gastonan envolvi cu e preparacion. Ta spera en berdad cu e beca ta yuda Kyra, Anouk, Allyson, Jordy, Stu-



art, Monica, Nicole y Thijs progresa den deporte y logra un clasificacion pa e Weganan Olimpico di Rio 2016.

COA tin sigur cu cada un di e atletanan aki lo sa di haci bon

uzo di e oportunidad aki, y cu e lo produci e resultadonan cu tanto nos ta anhela. Naturalmente COA ta spera cu tur ocho lo sa di logra e meta, esta e clasificacion pa e Weganan Olimpico di Rio 2016. □